



# 讀經劄記

朱鏡宙

父子合集經卷第九：「妄想邪思為苦本，隨生分別即為縛。智者了此悉皆空，得勝總持寂靜樂。妄想之心不平等，決定墮落於諸趣，百千生中為苦緣，三世如來同此說。若人取著於想者，則為陰界所纏縛。善觀察者息妄緣，一切皆空無有相。由想相故增諸惑，復能損滅諸福業；若於無相離狐疑，速證無上菩提果。」卷第十云：「如來具足平等慧，修寂靜行到彼岸，說寂靜法度群生。觀諸世間常寂靜，菩提寂靜本無染，依寂靜境無動亂，常餐寂靜甘露味，於一切處悉通達。如是最上寂靜道，善觀察者獲妙樂。依八正道久薰修，能斷世間煩惱縛。修寂靜法證菩提，乃是先佛之所說。決定能至涅槃城，如佛世尊無有異。」妄想取相，即是自縛，墮落諸趣。寂靜平等，即是彼岸，得涅槃樂。是知聖凡之別，盡在當前一念。如於一念之外，別求彼岸涅槃，斯則妄之又妄者也。

父子合集經卷十一：「世尊，以諸眾生本寂靜故，則無有苦。當如是知。所以者何？眾生無故，苦諦亦無。以無苦故，集諦亦無。何以故？若無是因，則無其果。世尊！以無集故，滅諦亦無。何以故？若無集諦，則無斷集。以無滅故，道諦亦無。何以故？無有是道不斷集者。世尊！彼煩惱業不可得故。斷煩惱滅，亦不可得。以滅不可得故，道亦不可得。未有是道無其異者。此四聖諦，但是分別假施設有。以非有故，不可說為過、現、未來。何以故？過去已滅，現在不住，未來未至，於三際中，皆不可得。依世俗諦，有種種相。若三際非有，彼則不生，亦非有滅。無想，無作、無施、無聽。無所說法，無了悟者，以彼三世，未曾有故。若法、若空，皆不可說。眾生顛倒，不能入解。無因、無緣，無名，無相，無所詮表

，無所趣向，自性離故，皆不可得。彼不可得，亦不可得。何以故？以眾生界本非有故。」寂靜相中，本無一法可立，故無眾生。眾生既無，安有所謂四諦法哉？乃知四諦及三十七道品等，皆依世俗諦說也。

父子合集經卷十五：「外道！若能親近諸善知識，是人即得慧眼清淨。以其慧眼，得見深法，若不具足信等五根，入解深法，無有是處！是故汝道諸外道輩，在昔生死長夜之中，為彼邪論之所誑惑，起於異見，堅執不捨，於其非法，取為正法。於非解脫，執為解脫。於非出離，而為出離。汝師自壞，亦壞汝等。……外道！汝今欲求解脫法者，應當發起清淨樂欲，一心尊重，精勤修學。先所未聞出離法要，當生淨信，令汝入解。先已學者，汝宗論議，應當捨離，更不尋求。先未獲得正法之藏，令汝悟入，通達無碍。」此為釋迦文佛於迦毘羅國城不遠之尼拘律陀林中。為外道婆羅門鉢哩囉惹迦與其眷屬六萬人而說者。以不解脫為解脫。以非出離為出離。如今日天國之說。皆為誑惑凡愚。非究竟法。然必盡捨先之所學。而後方能生信入解。此即今日科學家所主張之純客觀態度也。

父子合集經卷十六：「大王！云何眼處？謂四大種：地界、水界、火界、風界，所造淨色。若地界清淨，則眼處清淨。若水、火、風、界清淨，則眼清淨。何以故？由地界清淨，眼界得生，是中無有少法可得。如是！乃至風界清淨，眼處得生，是中無有少法可得。何以故？無主宰故，無造作故，猶如涅槃，自性清淨。大王！如果眼處各各尋求，皆不可得。所以者何？地界空故，則地界清淨。乃至風界空故，則空界清淨，若諸法自性本空。則彼界何有清淨，亦無忿靜；若淨若靜，皆不可得，復有何色而可見耶？」色即是空。應如是解。

父子合集經卷十六：「愚痴眾生，眼見色已，心生愛樂，復起貪著，為彼所牽，造貪業行。身業三種，語業四種，意業三種，最初造作，剎那滅謝，是業不依東西南北四維上下中間而住。於死邊際命根滅時，自分業報，皆悉現前。猶如夢覺，念夢中事。大王！識為其主，業為攀緣，二種相因，初識生起，或趣地獄，或墮旁生，或墮羅刹，及阿修羅，若人、若天。初識生已，各受其報，同分心品，相續隨轉，最後識滅，名為死蘊。最初識起，名為生蘊。大王！無有少法從此世得至他世。所以者何？性生滅故。大王！身識生時，無所從來，滅無所去。彼業生時，無所從來，滅無所去。初識生時，無所從來，滅無所去。何以故？自性離故。如了知：身識，身識空。自業，自業空。初識，初識空。若滅，滅空。若生，生空。了知業轉。無有作者，亦無受者，但唯名相分別顯示。」識生識滅。自性皆空。自業亦空。然自業雖空。而因果業報不爽。此則眾生一念執著之患也。或謂誠如是。則去執著可矣。答曰：此豈易言。非親證無生，蒙佛受記，終難逃此窠臼。正如世俗所謂法網恢恢，疏而不漏者也。